

Date – 16/02/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. March 16 thleng awh tur Mizoram Legislative Assembly 9-na thutkhawm vawi 6-na chu naktuk chawhma dar 10:30 khian Mizoram Legislative Assembly House-ah tan a ni ang.
2. MPSC chuan Mizoram Civil Service Combined Competitive Examination 2025 Final Result tun thla ni 9 a a tihchhuah chu a hnukkir.
3. Lawngtlai Bawrhsap Pu Donny Lalruatsanga chuan thla hnih chhung Myanmar leh Lawngtlai inrina khar a ni dawn a ti.
4. Vawiin khan India-AI Impact Summit 2026 hi New Delhi-a Bharat Mandapam-ah tan a ni

<><><>

ASSEMBLY

March 16 thleng awh tur Mizoram Legislative Assembly 9-na thutkhawm vawi 6-na chu naktuk chawhma dar 10:30 khian Mizoram Legislative Assembly House-ah tan a ni dawn a; session atan hian vawiin chawhnu dar 3 thleng khan House chhunga chhan chi zawhna (starred question) 1,223 a lut tawh a, ziaka chhan chi (un-starred question) 407 a lut tawh a, dan siam danglam tura rawtna (amendment bill) pathum leh bill pangngai pakhat a lut tawh.

Naktuka session tan hunah Governor Lt Gen (Retd) Vijay Kumar Singh an thu a sawi dawn a; tun thla ni 26-ah kum 2026-2027 Mizoram budget chu Finance enkawltu chief minister Pu Lalduhoma'n a pharh ang.

Vawiin tlai thlenga bill lut tawhte chu - Law & Judicial department atangin bill pahnih - 'The Mizo Marriage Divorce Inheritance of Property (Amendment) Bill, 2026' leh The Mizoram Jan Vishwas (Amendment of Provisions) Bill, 2026 te, Finance department atangin 'The Mizoram Goods and Services Tax (First Amendment) Bill, 2026' te, Land Revenue & Settlement department atangin 'The Mizoram (Prevention of Public Land Encroachment) Bill, 2026' te a ni a; MLA 10 hnen atangin resolution 5 theuh a lut tawh a, resolution hi a vaiin 50 a lut tawh a ni.

<><><>

P&E

Phai lam atanga Mizoramin Power a lakna pakhat, Palatana Power Plant, Module I chu vawiin chawhnu atanga a chian loh thut avangin Mizoramin Power duh khawp hman tur a nei lo thut a. Hei vang hian Indian Energy Exchange (Power Market) atangin lei belh tura ruahmanna siam a ni.

<><><>

MPSC

Mizoram Public Service Commission MPSC chuan Mizoram Civil Service Combined Competitive Examination 2025 Final Result tun thla ni 9 a a tihchhuah chu hnukkir a,

Hemi chungchanga MPSC thuchhuah tarlan danin, a tira hriat theih loh thu thar a awm avangin candidate zinga pakhat chu a tlinglo tih hmuhchhuah a ni tih sawiin a, Final result hi ennawn a, siamthat a ni dawn tih sawiin a siamthatna tgi chhuah a ni velehe result hi sut nghal a ni ang a ti.

Hemi chungchangah hian Adviser to CM, MLA Pu Lalmuanpuia Punte chuan hetiang sawiselna a awm hian thalai ten chonaah hmang zawk se a ti a, MPSC Combined Competitive Exam result tihchhuah ah State dang mi zohnahthlak pakhat a tling ve nawlh chu sawiselna thawm social media-ah a ri nasa viau mai a. Party tinin ‘Zohnahthlakte luah chin rorelna pakhata a awm theihna tura beih’ tih hi an thil tumah an dah vek avangin sawrkar kal tawhah pawh inhawng zau takin India ram chhunga Zohnahthlakte chu exam an phal thin a, an rawn exam a, an tling thin a, officer lal tak takte pawh an lo awm tawh thin a ti a. Sawrkar kal tawhte lo inhawna kha anni ZPM pawhin an chhonzawm mai a ni a ti.

Zohnahthlak Unaute a bik takin Manipur-a mite chu Central-ah an exam nasa a, an tling nasa a, Delhi-ah Ministry hrang hrangah an kal chuan, Zohnahthlak Manipur chhuak an tam em em a, chung mite chuan Mizoram tan thahnem lo ngaihpu em em thin tute an ni a ti a. Nikuma BSF recruitment-ah khan candidate zaa 60 zet chu Chakma an nih thu a sawiin, Hengte pawh hi harh phah nan hman ni se a ti.

<><><>

ZPM LEGAL BOARD

ZPM Legal Board chuan an Chairman Pu Vanlalsiama Pachuau hovin Assembly Speaker Pu Lalbiakzama hnenah Kum 2025 December ni 22 (Zirtawpni) a MNF MLA Pu Rohminglian ‘Assembly Committee on Petitions’ aiawha Report/Recommendation a thehluh chungchangah - Assembly House dan kalh leh tih dan phung pela report a thehlut nia lang te, a thehluh dawna media mi te kova report diklo a pe nia a lan avangin; hemi chungchang chhui fiah tura ngenna an thehlut.

Assembly Speaker Pu Lalbiakzama chuan ZPM Legal Board complaint thehluh chu lo dawngsawngin, dan anga an complaint thehluh te chu ngun taka an lo chhuizui phawt tur thu a lo hrilh a ni.

<><><>

MNF

MNF Party chuan vawiin khan Aizawl Vanapa Hall-ah Aizawl Municipal Corporation bial 19-a an candidate tur te an puang.

MNF Party President Pu Zoramthanga chuan MNF candidate puan chhuah takte chu chhuanawm an ti tih a sawi a, Pathian leh mipui zarah hnehna an chan ngei a beisei a ni a ti.

MNF President chuan ZPM Party chu Sinlung Hills inthlanah an tla a, VC/LC inthlanah an che tha lo a, Dampa bialah ruling an tla leh a, Lai District inthlanah MNF pakhatna an nia, Ruling pathumna an ni a ti a. AMC-ah rorelna mipuiin an pe leh ang em a ti.

Pu Zoramathanga chuan, hman atangin Airforce hian ram lei tur Congress leh MNF hunah pawh khan an zawng a. A tha alawm, a thuphungin MNF chuan an ti. An tih tak takna erawh chu May ni 15, 2025, khan Preliminary notification a chhuak ta a. An ram lei tur ZPM sorkar-in a zawng a, bul an tan ta tak tak a ni a ti a. Social impact assestment danin neih ngei ngei tur a tih chu nei ta lovin, Revenue Minister khan a tul love, tiin a cancel hmak mai a, Final notification chhuah a nih hmam cheng vaibelchhe 188 chuang zet kha Aizawl DC account-ah an lo chhung hman vek tawh a ti a, kha ram lei danah khan dan bawhchhiatna a nasa hle a. Dan lam an ngaihtuah tawh lo, sum ei ringawt kha an ngaihtuah a ni a ti.



ZPM reaction

ZPM Thalai chuan vawiin khan thuchhuah siamin, Mizoram a Sorkar hmun pawimawh leh Sorkar ramte hi khauh zawka humhalh turin mipui an ngen a.

Mizoram chhunga Sawrkar Department hrang hrang ten an ram an chan nasa tawh hle a, hei hi a bulpui berah chuan sawrkarna lo siam tawh party pahnih ten vote zawn nan leh politics khelh nan Department ramte an lo phalrai thin vang a ni an ti a, Sawrkar Department ten Department ram humhalhtu committee din hial a ngaih phah a mahse, Politics leh khawtlang a lo inrawlh tawh chuan a dingchang lo zawkah an tang ta thin a, hei hian kan sawrkar hnathawk te rilru pawh a hliam thin a ni an ti.

Kum 2023 MLA Election dawnah Aizawl West-III MNF Candidate chuan Bungkawng veng a Home Department ram, CID Complex chu khawtlang hnena pek a lo tiam avangin tun hnaiah mi thenkhatin CID Complex chu Bungkawng veng tana pe turin dilna an siam a. vawiin vek hian Kolasib khawpui chhung leh a chhehvel kawngpui Bituminous concrete-a chhunmam mai theih tura siam mek chu Opposition Political Party hruaitute fuihpawrh theih thalai thenkhat ten kawngzawhin hmasawwna kawngsiam hnathawk mek tute tan harsatna siam zawngin hma an la bawk an ti a. Heng thilah hian a meizang hlaptu ber leh a kaihruaitute hi opposition Political party mi lehsa an ni tih report an dawng tih an sawi bawk ani.

Tukin khan Aizawla Bungkawng veng thalai ten pisa kai tur ten an hmuh leh chhiar theih turin an veng awm CID tlang atanga CID te chhuak tura an duhna thuziak hrang hrang an pholang a, kum tam tak kalta an pi leh pute hma lo lak tawhna CID tlang - chu veng mipuite tana insawi zawi nan leh an tu leh fate lo awm tur tana hmuhma tha tak neih nan an duh avangin CID te chu chhuak turin an phut thu an ziak a ni.

Aizawl Bungkawng veng thalai pung khawm te chuan an hma lakna ah politics a tel loh thu sawiin, political party remchang lo zawng tura an duh loh thu an sawi a, CID tlang chu vantlang kuta a luh theihna turin rei tak hma an lo tawh a, Home minister te an hmuh tawh thin thu leh tun hnaia CM hmuh tumna lehkha an thehluh chu pawmpuina an hmuh lo avanga ralmuang muang taka an duh ang ngei a CID tlang vengchhung atana hman tangkai an duhna ti lang tura thalai pungkhawm an nih thu an sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

JAC ON NH PROTEST

Kolasib Joint Action Committee on National Highways huaihawtin kumin fur ruahtui tlak hma ngeia Mizoram ei leh bar lakluhna kawngpui siamthat a nih theih nan Kolasib ah vawiin khan kawng zawh a ni.

He kawngzawh hi Kolasib Diakkawn YMA Hall kawt atanga tanin, kawngzawh bul tan nan Joint Action Committee hruaitu te chuan kawng zawh chhan te sawifiahin Kolasib district chu kawng hrang hrangin hlamchhiah an ni an ti a, kawngpui chungchangah pawh, district thuneitu te bakah kawngpui enkawltu NHIDCL leh an hnuaia contractor te nen pawh tum engemawzat an thukhawm tawh a, heng hian awmzia a neih loh thu te, NHIDCL leh an hnuaia contractor te chu heng huna an intiam anga an awm zui ngai loh thu leh hmasawwna hmuh tur a awm loh thu te tarlangin, NHIDCL General Manager BK Srivastava chu Mizoram chhuahsan tura an duh thu an tarlang a ni.

Kawng an zawh hnu hian Joint Action Committee hruaitu te chu NHIDCL Office ah lengin NHIDCL hotu te nen an in kawm a, he hunah hian JAC Resolution te thlir hovin, NHIDCL hnuaia Highway contractor hrang hrang ten an chin theuh ah March ni 15 ral hmain Kolasib district chhunga kawngpui te chu zaa 75 tal siam zo ngei turin inremna an ziaak a, hei bakah hian High Court thu dinglai angin Vairengte atanga Sairang kawngpui an siam that mek hi April ni 30 ral hmaa zo hman ngei turin an phut tlat tih an sawi bawk.

<><><>

LAWNGTLAI-MYANMAR BORDER CLOSED

Lawngtlai Bawrhsap Pu Donny Lalruatsanga chuan thla hnih chhung Myanmar leh Lawngtlai inrina khar a ni dawn a ti.

Lawngtlai AOC venga cheng thihna thleng leh a nghawng te sawifiahin Lawngtlai DC chuan vawiin khan Lawngtlaia chanchinbu mite a kawm a, he thihna

avang hian hmalakna kawng hrang hrang kalpui mek a ni, a ti a. Thil sual titute chu 'foreigner' nimahse hremna pek ngei an nih theihna tura hmalak a nih tur thu a sawi.

Lawngtlai SP Pu PC Lalchunglura chuan Pu Lalramsanga ruang chu Ni 15 chawhnu dar 3:00 PM elah Salachhuah leh Chhimtuipui infinnaah hmuh a nih thu a sawi a. Police lamah FIR thehluh a nih tawh thu tarlangin case register - tawh niin, Phura Police station- ah transfer leh a ni ang a ti. SP chuan a chhuina chak taka kalpui a nih tur thu sawiin, murder case - a kalpui a nih tur thu a tarlang. CYLA leh MTP - te nen thawhhona tha tak a awm tih sawiin, pawl khawhtute chhuichhuaha hremna pe tura hmalak tum a nih thu a tarlang bawk.

<><><>

INDIA-AI IMPACT SUMMIT

Union Electronics and Information Technology Minister Ashwini Vaishnaw chuan India-a digital infrastructure changtlung leh thiamthil ngah em em mipuite avangin ramchhunga technology behchhana thil thar siam chhuak thinte sum thawhchhuah a pung a ti. Vawiina AI Impact Summit 2026-a inkawmhonaah he thu hi sawiin Pu Vaishnaw chuan aritificial intelligence AI chu ramchhunga hnathawhna hrang hrangah thil tha zawk tichhuaktu a ni chho mek a ti a. Ramchhunga hmun zaa 90 dawn chu 5G hmanga tuam chhuah tawh a ni a. Hei vang hian ramchhung mipui tamzawch chuan digital khawvel an pawh pha vek tawh a ti a ti bawk.

<><><>

PM

Vawiin khan India-AI Impact Summit 2026 hi New Delhi-a Bharat Mandapam-ah tan a ni. Ni nga chhung awh tur India-AI Impact Summit hi khawvel huap AI Summit Global South rama nghah a nih vawikhatna tur a ni a . He AI Impact Summit avang hian India chuan khawvela AI hmanga thiltihna hrang hrangah a dinhmun a chawikang viau dawn a ni.

Summit ah hian Khawvel ram hruaitu pawimawh tak tak an lo tel a. Heng zingah hian France President Emmanuel Macorn, Brazil President Luiz Inacio Lula da Silva, Spain President Pedro Sanchez Perez-Castjon leh Switzerland President Guy Parmelin te an tel a. External Ministry thuchhuah danin Bolivia, Croatia, Estonia, Finland, Greece, Guyana, Kazakhstan, Liechtenstein, Serbia, leh Slovakia hruaitute pawh he Summit ah hian anlo tel bawk ang

Prime Minister Narendra Modia chuan India-a AI Summit hmang tura khawvel hmun hrang hrang atanga hruaitu an lo kal tur chu India tan inchhuanna tham a ni a ti a. Vawiina social media lama a thuchhuahah Pu Modia chuan Summit hmang tura ram hruaitu, industry hotu, innovator, policy siamtute, zirbingna lam titute leh technology lama tui mite chu duhsakna alo hlan a. He summit hian India chu science and technology lamah nasa takin a thang tih a entir a ti a. Khawvel hmasawwna lamah pawh India chu a thawhhlawk ber pawl a ni tih a lantir a ni a ti.

<><><>